

国朝耆献类征初编



國朝耆獻類徵初編卷五十一目錄

卿貳十一

王士禎

馮甦

屠粹忠

葉方藹

蔣宏道

顧八代

李仙樓

田喜霖

周國柱

補錄

王士禎

100

100

1997

and 1994, the number of people with a disability in the United States is projected to increase by 10 million.

1

國朝耆獻類徵初編卷五十一

通奉大夫前署江西巡撫江西布政使司布政使湘陰李桓輯
卿貳十一

王士禎

王士禎山東新城人順治十五年進士十六年授揚州府推官

聖祖仁皇帝康熙三年總督郎廷佐巡撫張尙賢疏薦其品端才
敏奉職最勤總河朱之錫亦以委盤河庫綜覈精詳協助隄工剔
除蠹弊疏薦下部敘錄內升禮部主事遷本部員外郎八年司權
清江關還遷戶部郎中十一年充四川鄉試正考官還丁母憂十
五年六月仍補戶部郎中十七年正月 召對懋勤殿 諭吏部

曰王士禎詩文兼優以翰林用遂授侍講二月轉侍讀十月充順
天武鄉試正考官十九年十二月遷國子監祭酒二十二年十月
同司業劉芳喆疏言自漢高帝時以太牢祀孔子至唐宋元而隆
以王號明化治間尊以八佾十二籩豆其改大祀而爲中祀則嘉
靖九年張聰之議謂孔子生未得位不當舞八佾不知以位言之
非但不得舞八佾並不得舞六佾乃前代尊崇之有加無已者以
道德不以位也且禮祭從生者以天子而祀其師自當用天子禮
樂乞 敕禮臣與廷臣詳議籩豆樂舞之制又疏言從祀諸賢諸
儒名號位次尙宜釐正如十哲之位自明嘉靖閒議去封爵之後
稱冉子者凡三未有辨別兩廡諸賢諸儒從祀者也至有明一代

理學肇自霍州學正曹端其學以誠敬爲主禮部尙書章懋由博
返約斂華就實國子監祭酒蔡清所著蒙引尤見窮理之功禮部
侍郎呂柟左春坊贊善羅洪先刑部侍郎呂坤操履篤實咸有著
述發明聖道此明儒之當從祀者也有絳州貢生辛全生值明末
力以正學爲己任著書甚富以時代稍近未敢輕議乞 敕進遺
書或可仰裨 聖學之萬一又疏言國子監所貯十三經注疏二
十一史版刊自明初至崇禎十二年修補後迄今四十餘載不免
漫漶殘缺宜及時鳩工修補並 敕江南督撫察訪前明南監經
史版如未散佚卽行令學臣收貯儒學尊經閣中以嘉惠來學四
疏並下部議部臣以遵豆樂舞名號位次應俟 頒發會典遵循

增祀諸儒及徵進遺書均俟明史告成覈定其經史南北版修補收貯事如所請行二十三年十月遷少詹事十一月奉命祭告南海二十四年請假歸里旋丁父憂二十九年正月補原官三月遷都察院左副都御史尋充經筵講官並國史副總裁十月遷兵部督捕侍郎三十年二月充會試副考官三十一年八月調戶部右侍郎三十三年六月轉左充淵鑒類函總裁三十五年正月奉命祭告西嶽西鎮江瀆三十七年七月擢左都御史三十八年六月御史郭金城奏裁冗員事下吏部同都察院酌定應畱御史員數士禎言御史二十四員必不可減從之十一月遷刑部尚書四十年四月請假遷葬上諭廷臣曰山東人偏執好勝者多

惟王士禎則否其作詩甚佳居家除讀書外別無他事可給假五月不必開缺十月仍赴京任事四十三年七月步軍統領托合齊以宛平縣民薛應元控訴捐納通判王五太醫院吏目吳謙送刑部治罪刑部奏王五偪索私債縱僕鬪毆革通判職吳謙不知情免議得旨下三法司嚴審王五係已革工部匠役改名捐納通判屢逞兇斃命應斬吳謙同謀詐索應絞原審未得實之部臣降革有差士禎降三級調用九月左都御史舒輅等奏據革職刑部司員孫叔貽關福席爾璊赴訴原審王五吳謙先已取定口供續派辦彙有雲南司主事馬世泰囑開脫吳謙是以但擬王五流徙士禎同侍郎陳論謂一流徙一免議輕重太覺懸殊令改彙乃改

流徙爲穢革請 旨集質復得王府護衛色爾弼以開脫吳謙囑
長史穆爾泰轉囑馬世泰狀各論罪如律士禎與陳論辨未受囑
坐瞻徇革職四十九年十二月 詔加恩公事累誤年臻耄耋在
籍諸臣復士禎尙書銜五十年五月卒於家年七十有八所著有
帶經堂集皇華紀聞池北偶談香祖筆記居易錄分甘餘話粵行
三志秦蜀驛程隴蜀餘聞漁洋詩話 國朝謚法考諸書兄士祿
順治十六年進士官考功司員外郎士祜康熙九年進士並能詩
士禎爲編錄成集 今上乾隆三十年四月 諭閣臣曰原任刑
部尙書王士禎積學工詩在本朝諸人中流派較正從前未邀易
名之典宜示褒榮以爲稽古者勸其察例議謚 賜謚文簡其名

久作士正三十九年十二月 諭曰王士正之名原因恭避 廟諱而改但所改正字與原名音太不相近恐流傳日久後世幾不復知爲何人今改爲士禎庶與其弟兄行派不致混淆凡各館書籍記載俱一體照改

右 國史館本傳

新城大司寇王公以疾薨於家余旣爲位以哭越三月孤子啟涑等以公與宜人合葬有日謂稔知公者莫余若乃奉其行述來請銘余與公生同庚仕同時謬以文章氣誼定交京師嗣是宦跡各天每歲郵筒往復商推詩文都不及世俗事相好無閒者數十年昔鍾子期死伯牙不復鼓琴傷知音者希也余與公倡和久切劇

攻錯辱附賞音聞公凶問愴然有棄琴之感矧年迫桑榆舊遊星散忍無一言報公九原而違諸孤之請耶按狀公諱士禎字子真一字貽上號阮亭先世自諸城徙家新城爲濟南望族代有隱德自潁川公以下三世皆以太師公象乾貴累贈少師兼太子太師兵部尙書太師公母弟方伯公諱象晉以公貴 贈資政大夫經筵講官刑部尙書季子明經公諱與敕以公貴累 贈如其官生子四公其季也公生有異稟初入家塾善屬對能五七言詩不由師授出語往往驚其長老年十一應童子試縣府道皆第一十八歲中順治辛卯鄉試闈中定元三日旋改第六品格實駕元之上祖方伯公年九十一猶及見以家藏邢太僕書白鸚鵡賦賜之乙

未中會試公欲專攻詩古文詞不與 殿試明年省伯兄西樵公

於東萊學舍晨夕倡和有作成囊戊戌 殿試二甲謁選得揚州

推官揚當孔道四方舟車畢集人苦應接不暇公以遊刃行之與

諸名士文讌無虛日嘗因公事往來白門吳下詩日益工始自號

漁洋山人漁洋太湖中山也庚子秋充鄉試同考官名士多出其

門獻海寇諸重案全活無辜甚眾又設法募諸大僚及眾商代輸

欽賊二萬揚屬積逋一清癸卯冬充武闈同考官甲辰會元其首

卷也官揚五年內擢禮部主客司主事與同朝諸名公爲詩會合

肥龔宗伯主壇坫時余自黃州通判入 覲始與公定交如平生

歡已遷儀制司員外郎旋權清江關司船廠屏除陋規任滿遷戶

部福建司郎中壬子秋典四川鄉試歸途丁母艱服除補戶部四川司郎中時 上畱意古學 特詔公懋勤殿試詩稱 旨次日傳 諭王某詩文兼優著以翰林官用遂改侍講旋轉侍讀 本朝由部曹改詞臣自公始實異數也 上令入直南書房攷賜飲食文綺無算尋充明史纂修官己未冬典順天武闈會試先後三狀頭皆其門下人豔稱之次年遷國子祭酒禁絕餽遺取士多高才生士以不出大賢門下爲恥首奏請定孔廟祀典依成弘間儀制又請正從祀諸賢位號及增從祀理學眞儒又請修經史舊版雖部議未允行而有功正學良不愧人師矣甲子冬遷詹事府少詹事兼翰林院侍講學士旋奉 命代祀南海禮成歸次遊廬山

謁闕里復 命後一日卽請假歸省俄聞贈公已先十日卒徒跣
慟哭作孺子嘯蓋公生而孝友雖期功之喪亦必歔歔累日輒廢
寢饋至性不可及也葬畢赴補晉都察院左副都御史尋遷兵部
督捕右侍郎充經筵講官 三朝國史副總裁其在督捕三年酌
定條例奏請准行意在和平寬厚不輕提一人用杜州縣之擾軍
民德之辛未主試禮闈文風特盛壬申補戶部右侍郎兼轄京省
錢法甲戌轉左前後官戶部七年苞苴不入蕭然如寒素尤爲人
所難丙子春載 命代祀西岳西鎮江瀆戊寅晉都察院左都御
史正己率屬務持大體仍 命直南書房編纂 御集會御史郭
金城上疏請裁冗員下九卿議遂有欲裁御史數員者公力持不

可曰 國初設都察院御史至六十員後減至四十員及停止巡按之差所存僅二十四員每至巡城監禮侍班等差往往乏人余方欲題增數員豈可裁耶如論有異同余必上疏爭之同朝趨其言事乃已是冬晉刑部尙書遇秋審朝審平反矜愼民賴以不冤蓋自理刑內擢以迄副憲總憲會議多主寬和久有仁人之稱而司寇其尤著者也辛巳春請假遷葬準剋期五月不必開缺 主眷之隆得未曾有行裝無長物載書數車以隨好事者爲作圖畫還 朝未久以伸告冤抑一案失出罷官公卽日就道送者填塞衢巷莫不攀轅泣下歸葺夫子亭日事著述不與聞門外事四方求詩文者接踵至公亦灑然自得有請輒應人人厭其欲而去庚

寅冬 上諭內閣詢順治年間進士在籍者已無多人念公老成
宿望以公事望誤 特命復職公聞 命涕零扶病北向拜又草
疏命子啟訪詣 闕馳謝 皇上眷念舊臣始終以禮如此唐太
宗賜蘇味道詩君臣千載遇忠孝一生心公足以當之矣亡何病
劇伏枕猶爲揚州居烈婦立傳口授兒子書之蓋其居平不忘宿
諾大率類是公長身脩髯無聲色博弈之好惟嗜讀書公餘手不
釋卷性好客坐上恆滿談言亶亶至夜分不倦從不干人以私子
弟應試雖門生故舊爲主司未嘗以一言囑也又好汲引士類見
人有一長稱之惟恐不及以故遠近士大夫咸歸之嘗云余在九
卿中薦舉人才甚夥率不令其人知之他如老宿孤寒藉齒牙以

成名者不可僂指同年鈍翁汪公性嚴厲不輕許可人多舍汪而就公謂如坐春風中也公元配夫人張氏鄒平人都察院左都御史諡忠定諱延登孫女鎮江府推官諱萬鍾女年十四歸公事舅姑以孝相夫以敬御下以慈其周恤公之戚友族黨也有脫簪贈珮之風客至必親治酒肴不以委臧獲不幸先歿年四十二十餘年甘苦憂患與共公每出使必有詩寄之其卒也悲悼逾至自賦輓詩數十首至生卒年月詳具鈍翁所作志銘中生子四人長啟洩歲貢生原任荏平縣教諭候補知縣次啟渾庠生早卒次啟汾歲貢生原任唐山縣知縣候補知州次啟汧歲貢生候選教諭女四人一適庠生張秉鎮一早卒末字一字張秉鑾一字畢世淮孫